

# Wasatiyyah mesej penting tepis persepsi buruk terhadap Islam

KUALA LUMPUR 9 April - Konsep wasatiyyah yang diamalkan Malaysia merupakan satu mesej perpaduan sedunia yang penting dalam menepis segala persepsi buruk terhadap agama Islam selama ini.

Imam Diraja Jordan, Dr. Ahmad Mohammad Hlayyel Hlayyel berkata, konsep tersebut dapat memperkukuhkan lagi imej keamanan dan keharmonian yang dibawa aga-

ma tersebut.

Sehubungan itu, beliau menjelaskan, kemahuan Malaysia melalui Perdana Menteri, Datuk Seri Najib Tun Razak dalam memperkembangkan wasatiyyah wajar dipuji dan diberikan sokongan daripada semua pihak.

"Kemahuan untuk mencapai wasatiyyah ini merupakan kemahuan yang mencakupi aspek syarak dan pelaksanaan. Konsep ini ternyata

bukan slogan semata-mata tetapi sebagai reaksi oleh kerajaan.

"Bukan seperti negara-negara yang menggelar diri mereka sebagai demokrasi tetapi melakukan kehancuran termasuk membenarkan pertumpahan darah dan penindasan wanita.

"Oleh itu, adalah perlu bagi usaha dan kemahuan yang begitu kental seperti dilaksanakan Malaysia dalam mencapai wasati-

yyah ini. Ini agama kita, ini adalah mesej Islam yang wasatiyyah," katanya menerusi terjemahan Dekan Fakulti Pengajian Quran dan Sunnah Universiti Sains Islam Malaysia (USIM), Dr. Adnan Mohamed Yusoff.

Ahmad Mohammad berkata demikian ketika membentangkan kertas kerja bertajuk 'Pelaksanaan Pendekatan Wasatiyyah Masa Kini: Cabaran dan Masa Depan' dalam

Seminar Antarabangsa Wasatiyyah di sini hari ini.

Seminar dua hari itu yang dirasmikan Najib semalam dihadiri kira-kira 700 peserta dari dalam dan luar negara.

Dalam pada itu, Ahmad Mohammad menambah, konsep wasatiyyah hanya dapat dilaksanakan secara menyeluruh berdasarkan al-Quran dan hadis yang menyeru manusia ke arah kebaikan.